

ORANG ISLAM YANG TERKEMUKA

Ibnu Miskawayh

Abū ‘Alī Al-Khāzan Ahmad bin Muhammad bin Ya‘qūb, terkenal dengan nama Ibnu Miskawayh, berasal dari Parsi, wafat pada tahun 421H.

Mazhab Aristotelis

Ibnu Miskawayh, salah seorang dari ahli-ahli fikir yang memberi bekas dalam sejarah kebudayaan. Ia mempunyai ilmu tentang kebudayaan purbakala dengan luas dan sempurna. Selain seorang filsuf, ia juga seorang penyair yang mashyur.

Sebagaimana setengah filsuf-filsuf Islam yang lain, gemar kepada falsafah Yunani, Ibnu Miskawayh mendekati Mazhab Aristotelis, sebagaimana juga mereka yang menggemari falsafah tasauf, akhirnya menurut mazhab al-Ghazālī, dan mereka yang gemar kepada falsafah ‘amaliyyah menurutkan mazhab Ibn Khaldun.

Ibnu Miskawayh dan Schopenhauer

Ibnu Miskawayh, seorang filsuf yang berjalan atas jalan yang dipilihnya sendiri. Maksud yang terutama dari falsafahnya, ialah hendak menggambarkan kepada manusia “satu contoh yang tinggi dan suci sebagai manusia”, dan bagaimana jalan mencapai cita-cita itu dengan amal dan pendidikan diri sendiri. Iaitu seperti juga tujuan dari filsuf Schopenhauer (1788-1860) yang membentangkan buah fikirannya dalam kitabnya (yang diterjemahkan ke dalam bahasa Perancis):

“Kebijaksanaan Hidup”.

Psikologi, entrospektif

Yang amat dipentingkan oleh Ibnu Miskawayh dalam falsafahnya ialah “*‘Ilm al-Nafs*” atau psikologi. Sampai ke zaman Ibnu Miskawayh, umum orang yang hendak mempelajari falsafah, memulai dengan “‘Ilmu Mantik” dan berjenis-jenis ilmu alat yang lain, sebagai perkakas pencapai falsafah

Akan tetapi Ibnu Miskawayh merintiskan jalan baharu yang dikatakan berlawanan dengan itu.

Ibnu Miskawayh mulai dengan menyuruh mempertahankan diri sendiri dan mendidik rohani sendiri; membersihkan rohani dari segala macam syahwat dan tabiat-tabiat yang kurang baik. Setelah itu akan dapatlah kita menerima ilmu hikmah; dan berdasarkan kepada ilmu tentang mengenal diri sendiri itu, akan dapatlah kita meneruskan pemerkasaan kaedah-kaedah dan undang-undang dunia falsafah yang lebih jauh dan lebih sulit.

Inilah cara yang dinamakan orang sekarang “*introspektif method*” yang rupanya sudah dijalankan oleh filsuf muslim Ibnu Miskawayh, 900 tahun yang lalu,

Marilah kita dengar sedikit dari buah penanya yang penting, ringkas dan tajam, dipetik dari kitabnya: “Pendidik Budi”, bab “Ubat Takut mati”.

“Sesungguhnya takut mati itu tidak akan dirasa, kecuali oleh orang-orang yang tidak tahu erti mati yang sebenar-benarnya dan tidak

mengetahui ke mana dirinya akan pergi, dan dia menyangka apabila badan kasarnya itu rosak, atau rosak susunannya, akan hilang dan rosak pula “dayanya” sendiri, dengan erti hilang semata-mata. Atau, dia menyangka bahawa dalam mati itu ada sakit yang luar biasa, yang sangat berlainan dengan sakit yang biasa dirasai, hingga menyampaikannya ke lubang kubur, dan menjadikan kerosakannya. Dia yang mempunyai kepercayaan akan adanya siksaan yang akan menyimpannya sesudah mati, jadi bingung, tidak mengetahui apakah yang akan dihadapinya dan dia merasa sayang meninggalkan harta benda dan hasil keringatnya.

Ini semuanya sangka-sangka yang bukan pada tempatnya dan tidak ada buktinya”.

Demikianlah sedikit petikan, yang barangkali amat “moden” terdengarnya dalam zaman kita ini, bagi mereka yang sedang gemar menyelidiki psikologi umumnya dan bagi mereka yang asyik dengan satu bahagian dari ilmu tersebut yang dinamakan “psycho-analyst”.

Kalau ada pemuda-pemuda kita yang sedang menelaah kitab-kitab Sigmund Freud, psycho-analyst yang termasyhur di “Austrian” itu, silakanlah pula menyelidiki umpamanya: “Tahdhīb Al-Akhlāq”, mudah mudahan akan menambah pengetahuan dari kalangan kita Muslimin kepada pujangga kita dari zaman dahulu itu, yang sampai sekarang hanya dapat penghargaan rupanya dari pihak “orang lain” sahaja.

Mudah-mudahan akan menjadi sedikit ubat bag menyembuhkan penyakit “perasaan kecil” yang melemahkan rohani, yang umum ada dikalangan kita kaum muslimin zaman ini.

[Dipetik dari buah pena Tuan Muhammad Natsir, penganjur Islam Indonesia yang terkenal – P. Q]

Kenyataan kepada anggota-anggota

IKHWAN

Pemimpin Ikhwan dari satu ke satu masa berharap mendapat kerjasama dari anggota Ikhwan. Ikhwan selalu mengadakan ceramah-ceramahnya di Singapura dan untuk memberi peluang kepada saudara-saudara yang di luar Singapura maka kami mengusahakan supaya ceramah-ceramah itu dibukukan.

Ceramah yang pertama yang diucapkan oleh Prof Abdul Kahar Muzakkar telah kami siarkan.

Yang kedua – risalah “kesedaran” telah kami siarkan dan telah mendapat perhatian.

Yang ketiga ucapan kiyai Muhammad Arshad Talib Lubis sudah kami usahakan, juga ucapan Kiyai Nasr al-Dīn Laṭīf tentang ‘rumahtangga’ sedang kami usahakan untuk dibukukan.

Bagi satu-satu risalah itu kami tidak meminta bayaran harganya daripada anggota-anggota Ikhwan tetapi kami meminta tiap-tiap seoang mengantarkan setem 10 sen untuk belanja mengirimnya – lainnya tidak.

Tujuannya ialah supaya tiap-tiap anggota Ikhwan mendapat faedah dan manfaat dengan tidak berbelanja – selain daripada setem.

Pintalah kepada:

Ikhwan
356 & 358 Geylang Rd.,
Singapore – 14.